



2017 оны 09 дүгээр сарын 25
№36/993/

ТӨРИЙН МЭДЭЭЛЭЛ

МОНГОЛ УЛСЫН ИХ ХУРЛЫН АЛБАН МЭДЭЭЛЭЛ

**Монгол Улсын
Их Хурлын
тогтоол**

**Засгийн газрыг огцруулах
тухай**

**Монгол Улсын
Ерөнхийлөгчийн
зарлиг**

**Шүүгчийн албан тушаалаас
чөлөөлөх тухай**

**Монгол Улсын
Засгийн газрын
тогтоол**

Журам батлах тухай

ГАРЧИГ

МОНГОЛ УЛСЫН ИХ ХУРЛЫН ТОГТООЛ

512.	Засгийн газрыг огцруулах тухай	Дугаар 55	1933
МОНГОЛ УЛСЫН ЕРӨНХИЙЛӨГЧИЙН ЗАРЛИГ			
513.	Шүүгчийн албан тушаалаас чөлөөлөх тухай	Дугаар 22	1934
МОНГОЛ УЛСЫН ЗАСГИЙН ГАЗРЫН ТОГТООЛ			
514.	Журам батлах тухай	Дугаар 156	1934
515.	Тогтоолын хавсралтад өөрчлөлт оруулах тухай	Дугаар 157	1937
516.	Журам батлах тухай	Дугаар 160	1938

МОНГОЛ УЛСЫН ИХ ХУРЛЫН ТОГТООЛ

2017 оны 09 дүгээр
сарын 07-ны өдөр

Дугаар 55

Улаанбаатар
хот

Засгийн газрыг огцруулах тухай

Монгол Улсын Үндсэн хуулийн Хорин тавдугаар зүйлийн 1 дэх хэсгийн 6 дахь заалт, Дөчин гуравдугаар зүйлийн 2 дахь хэсэг, Монгол Улсын Их Хурлын чуулганы хуралдааны дэгийн тухай хуулийн 38 дугаар зүйлийн 38.2 дахь хэсэг, Монгол Улсын Засгийн газрын тухай хуулийн 21 дүгээр зүйлийн 1 дэх хэсгийг үндэслэн Монгол Улсын Их Хурлаас ТОГТООХ нь:

1.Монгол Улсын Ерөнхий сайд Жаргалтулгын Эрдэнэбатыг огцруулсугай.

2.Монгол Улсын Ерөнхий сайд Жаргалтулгын Эрдэнэбатыг огцруулсантай холбогдуулан түүний тэргүүлсэн Засгийн газрыг бүрэн бүрэлдэхүүнээр нь огцруулсугай.

3.Шинэ Ерөнхий сайдыг томилогдох хүртэл үүрэгт ажлаа гүйцэтгэж байхыг Ерөнхий сайд /Ж.Эрдэнэбат/-д, шинээр Засгийн газрын гишүүн-сайд томилогдтол үүрэгт ажлаа гүйцэтгэж байхыг Засгийн газрын гишүүдэд даалгасугай.



4.Энэ тогтоолыг 2017 оны 09 дүгээр сарын 07-ны өдрөөс эхлэн дагаж мөрдсүгэй.

**МОНГОЛ УЛСЫН
ИХ ХУРЛЫН ДАРГА**

М.ЭНХБОЛД

МОНГОЛ УЛСЫН ЕРӨНХИЙЛӨГЧИЙН ЗАРЛИГ

2017 оны 08 дугаар
сарын 08-ны өдөр

Дугаар 22

Улаанбаатар
хот

Шүүгчийн албан тушаалаас чөлөөлөх тухай

Монгол Улсын Үндсэн хуулийн Тавин нэгдүгээр зүйлийн 2, Монгол Улсын Ерөнхийлөгчийн тухай хуулийн 12 дугаар зүйлийн 16, Шүүгчийн эрх зүйн байдлын тухай хуулийн 18 дугаар зүйлийн 18.2 дахь хэсгийг тус тус үндэслэн ЗАРЛИГ БОЛГОХ нь:

Өндөр насны тэтгэвэр тогтоолгох насанд хүрсэн Дамдинжамцын Буянтогтохыг Төв аймаг дахь сум дундын эрүүгийн хэргийн анхан шатны шүүхийн шүүгчийн албан тушаалаас чөлөөлсүгэй.

**МОНГОЛ УЛСЫН
ЕРӨНХИЙЛӨГЧ**

**ХАЛТМААГИЙН
БАТТУЛГА**

МОНГОЛ УЛСЫН ЗАСГИЙН ГАЗРЫН ТОГТООЛ

2017 оны 5 дугаар
сарын 30-ны өдөр

Дугаар 156

Улаанбаатар
хот

Журам батлах тухай

Эрүүл мэндийн даатгалын тухай хуулийн 16.3-т заасныг үндэслэн Монгол Улсын Засгийн газраас ТОГТООХ нь:

“Төр төлбөрийг нь хариуцах эрүүл мэндийн зарим тусламж, үйлчилгээг худалдан авах үйл ажиллагааны журам”-ыг хавсралт ёсоор баталсугай.

**МОНГОЛ УЛСЫН
ЕРӨНХИЙ САЙД**

Ж.ЭРДЭНЭБАТ

**ХӨДӨЛМӨР, НИЙГМИЙН
ХАМГААЛЛЫН САЙД**

Н.НОМТОЙБАЯР

Засгийн газрын 2017 оны 156 дугаар
тогтоолын хавсралт

ТӨР ТӨЛБӨРИЙГ НЬ ХАРИУЦАХ ЭРҮҮЛ МЭНДИЙН
ЗАРИМ ТУСЛАМЖ, ҮЙЛЧИЛГЭЭГ ХУДАЛДАН АВАХ
ҮЙЛ АЖИЛЛАГААНЫ ЖУРАМ

Нэг. Нийтлэг үндэслэл

1.1. Эрүүл мэндийн тухай хуулийн 24.6-д заасан төр төлбөрийг нь хариуцах эрүүл мэндийн зарим тусламж, үйлчилгээг худалдан авах үйл ажиллагааг нийгмийн даатгалын байгууллага гэрээний үндсэн дээр гүйцэтгэхтэй холбоотой харилцааг энэхүү журмаар зохицуулна.

1.2. Нийгмийн даатгалын байгууллага гэрээ байгуулсан худалдан авах төлбөрийг нь төр хариуцах эрүүл мэндийн зарим тусламж, үйлчилгээ (цаашид "тусламж, үйлчилгээ" гэх)-ний нэр төрөл болон төлбөрийн хэмжээг эрүүл мэнд, санхүү, төсвийн болон нийгмийн даатгалын асуудал эрхэлсэн Засгийн газрын гишүүд хамтран батална.

1.3. Иргэн, даатгуулагчид тусламж, үйлчилгээ үзүүлэх заавар, чанарын шалгуур үзүүлэлт, хяналт тавих журмыг холбогдох хууль тогтоомжид нийцүүлэн эрүүл мэндийн асуудал эрхэлсэн Засгийн газрын гишүүн батална.

1.4. Эрүүл мэндийн асуудал эрхэлсэн төрийн захиргааны төв болон нийгмийн даатгалын төв байгууллага энэхүү журмын 1.2-т заасан тушаалыг үндэслэн жил бүр гэрээ байгуулан тусламж, үйлчилгээг худалдах, худалдан авах үйл ажиллагааг зохион байгуулна.

1.5. Энэхүү журмын 1.4-т заасан гэрээнд эрүүл мэндийн байгууллагаас худалдан авах тусламж, үйлчилгээний нэр төрөл, тоо хэмжээ, улсын төсвөөс санхүүжүүлэх хөрөнгө болон төсвийн сарын хуваарь, төлбөр хийх хугацаа, талуудын эрх, үүрэг, хүлээх хариуцлага, тусламж, үйлчилгээний чанарт тавих хяналтын асуудлыг тодорхой тусгана.

1.6. Эрүүл мэндийн болон нийгмийн даатгалын асуудал эрхэлсэн төрийн захиргааны төв байгууллага нь тусламж, үйлчилгээг худалдан авах үйл ажиллагааны талаар нийгмийн даатгалын болон эрүүл мэндийн байгууллагыг мэргэжил, арга зүйн удирдлагаар хангана.



1.7. Нийгмийн даатгалын байгууллага нь иргэн, даатгуулагчид үзүүлсэн тусламж, үйлчилгээний чанар, хүртээмжид хяналт тавьж, тусламж, үйлчилгээг худалдан авах, зардлын төлбөрийг санхүүжүүлэх үйл ажиллагааг эрхлэн гүйцэтгэнэ.

1.8. Иргэн, даатгуулагчид тусламж, үйлчилгээ үзүүлэх эрүүл мэндийн байгууллагыг Эрүүл мэндийн даатгалын тухай хуулийн 14.9.11-д заасан журмын дагуу сонгон шалгаруулна.

1.9. Эрүүл мэндийн даатгалын тухай хуулийн 10.1-д заасан даатгалын гэрээг нийгмийн даатгалын байгууллагатай байгуулсан эрүүл мэндийн байгууллага иргэн, даатгуулагчид тусламж, үйлчилгээг үзүүлнэ.

Хоёр. Тусламж, үйлчилгээний санхүүжилт

2.1. Санхүү, төсөв, эрүүл мэнд, нийгмийн даатгалын асуудал эрхэлсэн Засгийн газрын гишүүд тухайн төсвийн жилд худалдан авах тусламж, үйлчилгээнд шаардагдах хөрөнгийг эрүүл мэндийн даатгалын сангийн төсвийн багцад тусган батлуулна.

2.2. Тухайн жилийн батлагдсан төсвийн нарийвчилсан хуваарийг эрүүл мэндийн байгууллага бүрээр Эрүүл мэндийн даатгалын үндэсний зөвлөл батална.

2.3. Иргэн, даатгуулагчид тусламж, үйлчилгээ үзүүлэх эрүүл мэндийн байгууллагад зардлын төлбөрийн тодорхой хувийг батлагдсан төсвийн сарын хуваарийг үндэслэн урьдчилан олгож болно.

2.4. Эрүүл мэндийн байгууллага нь иргэн, даатгуулагчид үзүүлсэн тусламж, үйлчилгээний зардлын төлбөрийн нэхэмжлэл, жагсаалтыг холбогдох маягтын дагуу цаасан болон цахим хэлбэрээр гарган сар бүрийн 20-ны өдрийн дотор нийгмийн даатгалын байгууллагад хүргүүлнэ.

2.5. Нийгмийн даатгалын байгууллага нь эрүүл мэндийн байгууллагаас ирүүлсэн тусламж, үйлчилгээний зардлын төлбөрийн нэхэмжлэл, жагсаалтыг даатгуулагч бүрээр шалгаж, зардлын төлбөрийг гүйцэтгэлээр нь сар бүрийн 25-ны өдрийн дотор эрүүл мэндийн байгууллагын харилцах дансанд шилжүүлнэ.



2.6. Талууд тусламж, үйлчилгээний зардлын төлөвлөгөө, гүйцэтгэл, харилцах дансаар шилжүүлсэн хөрөнгийг улирал бүрийн сүүлийн сарын 28-ны өдрийн дотор тооцоо нийлж баталгаажуулна.

2.7. Нийгмийн даатгалын байгууллага худалдан авсан тусламж, үйлчилгээний нэр төрөл, тоо хэмжээ, олгосон санхүүжилтийн талаарх мэдээллийг улирал бүр нийгмийн даатгалын болон эрүүл мэндийн асуудал эрхэлсэн төрийн захиргааны төв байгууллагад хүргүүлнэ.

Гурав. Бусад

3.1. Эрүүл мэндийн болон нийгмийн даатгалын байгууллага нь тусламж, үйлчилгээтэй холбоотой мэдээллээр иргэн, даатгуулагчийг хангаж ажиллана.

3.2. Эрүүл мэндийн болон нийгмийн даатгалын асуудал эрхэлсэн төрийн захиргааны төв байгууллага тусламж, үйлчилгээний үр дүн, өртөг, зардлын тооцоо, эрүүл мэндийн даатгалын сангийн болон хүний нөөцийн чадавхын талаар тооцоо, судалгаа хийж санал боловсруулна.

3.4. Энэ журмыг зөрчсөн тохиолдолд буруутай байгууллага, албан тушаалтан, даатгуулагч хууль тогтоомжийн дагуу хариуцлага хүлээнэ.

МОНГОЛ УЛСЫН ЗАСГИЙН ГАЗРЫН ТОГТООЛ

2017 оны 5 дугаар
сарын 30-ны өдөр

Дугаар 157

Улаанбаатар
хот

Тогтоолын хавсралтад өөрчлөлт оруулах тухай

Нийтээр тэмдэглэх баярын болон тэмдэглэлт өдрүүдийн тухай хуулийн 5.2-т заасныг үндэслэн Монгол Улсын Засгийн газраас ТОГТООХ нь:

1. Засгийн газрын 2010 оны 172 дугаар тогтоолоор баталсан “Түүхэн үйл явдлын ой, тэмдэглэлт өдрийг тэмдэглэх, гавьяат үйлстнийг алдаршуулах, дурсгалыг нь мөнхжүүлэх журам”-ын 4.1.3 дахь заалтыг дор дурдсанаар өөрчлөн найруулсугай:



4.1.3. Хөдөлмөр, нийгмийн хамгааллын салбарын ажилтны өдөр-жил бүрийн 5 дугаар сарын 3 дахь Бямба гараг”.

2. Энэ тогтоол гарсантай холбогдуулан мөн журмын 4.1.50 дахь заалтыг хүчингүй болсонд тооцсугай.

**МОНГОЛ УЛСЫН
ЕРӨНХИЙ САЙД**

Ж.ЭРДЭНЭБАТ

**ХӨДӨЛМӨР, НИЙГМИЙН
ХАМГААЛЛЫН САЙД**

Н.НОМТОЙБАЯР

МОНГОЛ УЛСЫН ЗАСГИЙН ГАЗРЫН ТОГТООЛ

2017 оны 6 дугаар
сарын 7-ны өдөр

Дугаар 160

Улаанбаатар
хот

Журам батлах тухай

Засгийн газрын тухай хуулийн 30 дугаар зүйлийн 1 дэх хэсэгт заасныг үндэслэн Монгол Улсын Засгийн газраас ТОГТООХ нь:

1. "Гадаадын арбитр болон гадаад улсын шүүхэд маргаан үүсэхээс урьдчилан сэргийлэх, маргааныг хэлэлцээний замаар шийдвэрлэх, маргаан үүссэн тохиолдолд баримтлах журам"-ыг хавсралт ёсоор баталсугай.

2. Гадаад улсын хуулийн этгээдтэй гэрээ байгуулах, маргаан үүсэх болон маргааныг шийдвэрлэх шатанд энэ тогтоолын 1 дүгээр зүйлд заасан журмыг баримталж ажиллахыг Засгийн газрын гишүүн, Засгийн газрын агентлагийн дарга нарт болон төрийн өмчит, төрийн өмчийн оролцоотой компанийн удирдлагад тус тус даалгаж, Улсын Их Хуралд ажлаа шууд тайлагнадаг байгууллагын дарга нарт зөвлөмж болгосугай.

3. Журмын хэрэгжилтэд хяналт тавьж ажиллахыг Монгол Улсын сайд, Засгийн газрын Хэрэг эрхлэх газрын дарга Ж.Мөнхбат, Хууль зүй, дотоод хэргийн сайд С.Бямбацогт нарт үүрэг болгосугай.

**МОНГОЛ УЛСЫН
ЕРӨНХИЙ САЙД**

Ж.ЭРДЭНЭБАТ

**ХУУЛЬ ЗҮЙ, ДОТООД
ХЭРГИЙН САЙД**

С.БЯМБАЦОГТ

Засгийн газрын 2017 оны 160 дугаар
тогтоолын хавсралт

ГАДААДЫН АРБИТР БОЛОН ГАДААД УЛСЫН ШҮҮХЭД
МАРГААН ҮҮСЭХЭЭС УРЬДЧИЛАН СЭРГИЙЛЭХ, МАРГААНЫГ
ХЭЛЭЛЦЭЭНИЙ ЗАМААР ШИЙДВЭРЛЭХ, МАРГААН ҮҮССЭН
ТОХИОЛДОЛД БАРИМТЛАХ ЖУРАМ

Нэг. Нийтлэг үндэслэл

1.1. Энэхүү журмын зорилго нь гадаадын арбитр болон гадаад улсын шүүхэд маргаан (цаашид “маргаан” гэх) үүсэхээс урьдчилан сэргийлэх, маргааныг хэлэлцээний замаар шийдвэрлэх, маргааныг шүүх, арбитраар шийдвэрлэх шатанд төрийн байгууллага хоорондын ажлын уялдаа, дотоод зохион байгуулалттай холбоотой харилцааг зохицуулахад оршино.

1.2. Монгол Улсын яам, Засгийн газрын агентлаг, төрийн холбогдох бусад байгууллага, төрийн өмчит болон төрийн өмчийн оролцоотой хуулийн этгээд (цаашид “Эрх бүхий этгээд” гэх) маргааныг гадаадын арбитр, гадаад улсын шүүхээр шийдвэрлүүлэх заалт бүхий гэрээ байгуулах, талуудын хооронд үүссэн маргааныг хэлэлцээний замаар шийдвэрлэх, шүүх, арбитрийн шатанд маргааныг шийдвэрлэх бүх үе шатанд энэхүү журмыг баримтална.

1.3. Энэхүү журмын 1.2-т заасан байгууллага гадаад улсын хуулийн этгээдтэй гэрээ байгуулах, түүнийг хэрэгжүүлэх явцад маргаан үүсгэхээс урьдчилан сэргийлэх, маргаан үүссэн тохиолдолд асуудлыг хэлэлцээний замаар шийдвэрлэхийг эрмэлзэж ажиллана.

Хоёр. Маргаанаас урьдчилан сэргийлэх

2.1. Маргаанаас урьдчилан сэргийлэх арга хэмжээг гэрээний төсөл боловсруулах болон гомдол гаргасан шатанд эрх бүхий этгээд авч хэрэгжүүлнэ.

2.2. Гэрээгээр зохицуулах асуудлыг хариуцсан төрийн захиргааны төв байгууллага гэрээний төслийг боловсруулах Ажлын хэсэг байгуулна. Ажлын хэсгийн бүрэлдэхүүнд санал, дүгнэлт гаргах байгууллагын төлөөлөл оролцсон тохиолдолд санал, дүгнэлт өгсөнд тооцно.



2.3. Маргааныг гадаадын арбитр, гадаад улсын шүүхээр шийдвэрлүүлэх тухай заалт бүхий хоёр болон олон талт олон улсын гэрээ байгуулах, түүнд нэгдэн ороход уг олон улсын гэрээгээр зохицуулах асуудлыг хариуцсан төрийн захиргааны төв байгууллага Олон улсын гэрээний тухай хуулийн 9.3-т заасны дагуу холбогдох бусад байгууллагын санал, дүгнэлтийг авна.

2.4. Маргааныг гадаадын арбитр, гадаад улсын шүүхээр шийдвэрлүүлэх тухай заалт бүхий хоёр болон олон талт олон улсын гэрээ байгуулах, түүнд нэгдэн ороход Олон улсын гэрээний тухай хуульд заасан журмын дагуу тухай бүр хууль зүйн болон гадаад харилцааны асуудал эрхэлсэн төрийн захиргааны төв байгууллагуудтай тохиролцоно.

2.5. Эрх бүхий этгээд нь гадаадын улсын хуулийн этгээдтэй байгуулах орд ашиглах, хөрөнгө оруулалт, бүтээгдэхүүн хуваах, Засгийн газрын бондтой холбоотой болон концессын гэрээний төсөл боловсруулах Ажлын хэсгийн бүрэлдэхүүнд санхүү, төсөв, хууль зүйн болон гадаад харилцааны асуудал эрхэлсэн төрийн захиргааны төв байгууллагын төлөөллийг заавал оруулах бөгөөд Хөрөнгө оруулагчдын эрх ашгийг хамгаалах зөвлөл (цаашид “Зөвлөл” гэх), холбогдох бусад байгууллагын санал, дүгнэлтийг авна.

2.6. Энэхүү журмын 2.5-д заасан байгууллага нь санал, дүгнэлт гаргахдаа тухайн байгууллагын эрхлэх асуудлын хүрээнд хамаарах төрийн бодлого, Монгол Улсын олон улсын гэрээ, хууль тогтоомжид нийцсэн байдал, эрсдэлийг урьдчилан тооцно.

2.7. Хоёр болон олон талт олон улсын гэрээг бүртгэх, хадгалуулах асуудлыг Олон улсын гэрээний тухай хуулийн дагуу зохицуулна. Энэхүү журмын 2.4-т заасан гэрээг байгуулмагц талууд зөвшөөрсөн тохиолдолд хуулбарыг нь гэрээ байгуулсан этгээд хөрөнгө оруулалтын асуудал хариуцсан төрийн захиргааны байгууллага болон Зөвлөлд тус тус хүргүүлнэ.

2.8. Хөрөнгө оруулалтын асуудал хариуцсан төрийн захиргааны байгууллага энэхүү журмын 2.7-д зааснаас бусад гэрээг бүртгэн мэдээллийн нэгдсэн санг хөтөлнө.



Гурав. Маргааныг хэлэлцээний замаар шийдвэрлэх

3.1. Хөрөнгө оруулагчаас ирүүлсэн гадаадын арбитр, гадаад улсын шүүхэд маргаан үүсгэх тухай албан бичиг, мэдэгдлийг хүлээн авсан эрх бүхий этгээд уг асуудлыг хууль зүйн асуудал эрхэлсэн төрийн захиргааны төв байгууллага болон Зөвлөлд нэн даруй бичгээр мэдэгдэнэ.

3.2. Хууль зүйн асуудал эрхэлсэн төрийн захиргааны төв байгууллага энэхүү журмын 3.1-д заасан мэдэгдлийг хүлээн авснаас хойш ажлын 5 хоногийн дотор тухайн маргаанд холбогдох яам, агентлаг, байгууллагын эрх бүхий төлөөллөөс бүрдсэн ажлын хэсэг байгуулна.

3.3. Ажлын хэсэг нь ажлын 21 хоногийн дотор маргааныг хэлэлцээний замаар шийдвэрлэх боломжийг судалж санал боловсруулан Зөвлөлөөр хэлэлцүүлж, Засгийн газрын хуралдаанд танилцуулна.

3.4. Энэхүү журмын 3.2-т заасан ажлын хэсэг нь дор дурдсан эрх, үүрэгтэй:

3.4.1. шаардлагатай мэдээ, мэдээллийг холбогдох төрийн байгууллагаас шуурхай гаргуулан авах;

3.4.2. тодорхой асуудлаар шинжээч, мэргэжилтэн томилж, дүгнэлт гаргуулах, шаардлагатай тохиолдолд зөвлөх үйлчилгээ авах;

3.4.3. Засгийн газар маргааныг хэлэлцээний замаар шийдвэрлэхийг даалгасан тохиолдолд хэлэлцээ хийх эрх бүхий этгээдийг томилох, шаардлагатай тохиолдолд зуучлах үйлчилгээ авах, баримтлах журам, чиглэл, удирдамжийн талаарх саналаа Засгийн газарт танилцуулах;

3.4.4. шаардлагатай бусад.

3.5. Засгийн газар маргааныг хэлэлцээний замаар шийдвэрлэхээр тогтсон тохиолдолд түүнийг төлөөлж хэлэлцээ хийх эрх олгох, хэлэлцээ хийх чиглэл, удирдамжтай холбоотой асуудлыг энэхүү журмын 3.2-т заасан ажлын хэсгийн саналыг үндэслэн Засгийн газар шийдвэрлэнэ.

3.6. Маргалдагч талтай хэлэлцээ хийх үүрэг бүхий ажлын хэсэг нь хэлэлцээний явцыг ажлын 10 хоног тутам Засгийн газарт танилцуулж, чиглэл авна.



Дөрөв. Маргааныг шүүх, арбитрын шатанд шийдвэрлэх

4.1. Хөрөнгө оруулагч маргааныг хэлэлцээний замаар шийдвэрлэх боломжгүй гэж үзэн гадаадын арбитр, гадаад улсын шүүхэд нэхэмжлэл гаргах талаар Засгийн газарт мэдэгдсэн, эсхүл гаргасан бол хууль зүйн асуудал эрхэлсэн төрийн захиргааны төв байгууллагаар ахлуулан ажлын хэсэг байгуулна.

4.2. Энэ журмын 4.1-д заасан ажлын хэсгийг Засгийн газрын шийдвэрээр байгуулах бөгөөд дараах бүрэн эрхтэй байна:

4.2.1. шаардлагатай мэдээлэл, баримт бичгийг холбогдох байгууллагаас шуурхай, саадгүй гаргуулж авах;

4.2.2. холбогдох албан тушаалтныг ажлын хэсгийн хуралд дуудаж, мэдээлэл авах;

4.2.3. хуулийн зөвлөх компани (цаашид “Зөвлөх компани” гэх)-ийн талаар судалгаа хийж Засгийн газарт танилцуулах;

4.2.4. Засгийн газрын шийдвэрээр сонгогдсон зөвлөх компанитай гэрээ байгуулах. Шаардлагатай тохиолдолд орчуулагч сонгож, гэрээ байгуулах;

4.2.5. зөвлөх компанийн санал болгосон арбитрчдын талаар судалгаа хийж, Засгийн газарт танилцуулан шийдвэрлүүлэх;

4.2.6. шаардлагатай тохиолдолд шинжээч компанийг Төрийн болон орон нутгийн өмчийн хөрөнгөөр бараа, ажил, үйлчилгээ худалдан авах тухай хуулийн дагуу сонгон шалгаруулах, Засгийн газарт танилцуулсны үндсэн дээр гэрээ байгуулж ажиллуулах;

4.2.7. Засгийн газрыг маргааны нөхцөл байдал, явц, зөвлөх компанийн ажлын гүйцэтгэл болон шаардлагатай бусад мэдээллээр шуурхай, тогтмол хангах;

4.2.8. энэхүү журмын 4.2.4-т заасан хуулийн зөвлөх компанийг шаардлагатай мэдээлэл, баримт бичиг, нотлох баримтаар хангах арга хэмжээ авах.



4.3. Энэхүү журмын 3.4.2, 3.4.3, 4.2.3-т заасан ажиллагааг явуулахад дараах шалгуурыг харгалзаж болно:

4.3.1. тухайн салбар дахь нэр хүнд, туршлага, ажлын амжилт;

4.3.2. тухайн төрлийн маргаан болон холбогдох салбараар мэргэшсэн байдал;

4.3.3. санал болгож байгаа үйлчилгээний хөлс, бусад хөнгөлөлт;

4.3.4. ашиг сонирхлын зөрчилгүй байх;

4.3.5. бусад.

Тав. Шүүх, арбитрын ажиллагааны зардал

5.1. Хууль зүйн асуудал эрхэлсэн Засгийн газрын гишүүн энэ журмын 4.2.5-д заасны дагуу гэрээ байгуулсан зөвлөх компани болон орчуулагчийн үйлчилгээний хөлс, арбитрын төлбөрийг тухай бүр холбогдох хууль тогтоомжийн дагуу Засгийн газарт танилцуулж шийдвэрлүүлнэ.

5.2. Энэхүү журмын 5.1-д заасан Засгийн газрын шийдвэрийг үндэслэн санхүү, төсвийн асуудал эрхэлсэн төрийн захиргааны төв байгууллага арбитрын төлбөр, олон улсын хуулийн зөвлөх компани болон орчуулагчийн үйлчилгээний хөлсийг холбогдох дансанд шилжүүлэх ажлыг шуурхай зохион байгуулна.

5.3. Хууль зүйн асуудал эрхэлсэн төрийн захиргааны төв байгууллага арбитрын ажиллагаатай холбогдон гарах гадаад томилолтын зардлыг дараа жилийн төсөвт тусгуулах арга хэмжээ авна.

Зургаа. Бусад

6.1. Эрх бүхий этгээд энэ журмын хэрэгжилтийг тухай бүр Зөвлөлд танилцуулна.

6.2. Энэхүү журмын 3.5, 4.1-д заасан ажлын хэсгийн гишүүд, олон улсын хуулийн зөвлөх компани, гэрээ байгуулсан орчуулагч болон ажлын журмаар нууцын зэрэглэлтэй мэдээ, баримт бичигтэй танилцсан аливаа этгээд хуулиар хамгаалагдсан мэдээ, баримт бичгийг Төрийн болон албаны нууцын тухай хуульд заасан үндэслэл, журамд нийцүүлэн ашиглаж, хадгалж, хамгаална.



Тайлбар: Төрийн болон албаны нууцын тухай хууль хүчин төгөлдөр үйлчилж эхлэх хүртэлх хугацаанд Төрийн нууцын тухай болон Байгууллагын нууцын тухай хуулийг баримтална.

6.3. Энэ журмын 3.5, 4.1-д заасан ажлын хэсгийн гишүүн төрийн албанаас чөлөөлөгдсөн буюу өөр ажил, албан тушаалд шилжсэн бол маргааныг эцэслэн шийдвэрлэх хүртэл нууцыг хадгална.

6.4. Энэ журамд заасан ажлын хэсгийн бүрэлдэхүүнд ажиллах албан тушаалтан нь Нийтийн албанд нийтийн болон хувийн ашиг сонирхлыг зохицуулах, ашиг сонирхлын зөрчлөөс урьдчилан сэргийлэх тухай хуулийн 8 дугаар зүйлд заасны дагуу ашиг сонирхлын зөрчилгүй тухай мэдэгдэл гаргана.

Хаяг:

“Төрийн мэдээлэл” эмхэтгэлийн редакц,
Улаанбаатар-14201, Төрийн ордон 124 тоот
И-мэйл: turiin_medeel@parliament.mn

Утас: 262420

Хэвлэлийн хуудас: 0.75

Индекс: 200003